

Tuts cunter Semyel Bissig

Skis: Campiunadi svizzer dals Juniors U16

DA GION NUTEGN STGIER / ANR

■ Oz cumenza a Les Diablerets il Campiunadi da skis naziunal per mattas e mats da 14 fin 16 onns. En las disciplinas tecnicas cumbattan er 13 skiunzs e 9 skiunzas da noss chantun per medaglias. La stagiun da skis v'ha plaunsieu en la fasa finala. Dentant ch'ils campiunadis svizzers da l'elita èn già stads han mattas e mats da la «JO» anc dad eruir las campiunessas ed ils campiuns. Las disciplinas slalom gigant e slalom stattan questa fin d'emna sin il program a Les Diablerets. Las disciplinas Super-G e cursa rapida han lura lieu la proxima emna a Lai. Avant in onn tar ils campiunadis naziunals a Tavau aveva *Moreno Caplazi* da Bravuogn fatg ina medaglia d'argient e *Rafael Berther* da Trun-Tujetsch è vegni terz en il slalom gigant. Gudagnà omadus cursas aveva *Semyel Bissig* dal cader da skis da la Svizra centrala. Las mattas grischunas avevan gudagnà a Tavau naginas medaglias e campiunessa dubla è vegnida *Mélanie Meillard*, la matta vallesana.

Yannick Caduff in dals favorits

A Les Diablerets è segir danovamain Semyel Bissig il grond favorit per gudagnar aur en il slalom gigant ed er en il slalom. En la Cuppa Ochsner dals juniors maina el actualmain cun 400 puncts, cun esser stà quatter giadas sisum il podest grazia a sias victorias. Dals mats grischuns tutga segir *Yannick Caduff* tar in da quels cun



Yannick Caduff tutga en il slalom tar in dals favorits tar il campiunadi svizzer da juniors da questa fin d'emna a Les Diablerets.

FOTO G. N. STGIER

il potenzial per gudagnar ina medaglia. Cunzunt en il slalom ha il campion grischun bunas schanzas da cuntanscher in plaz da podest. Tar las mattas è er da la partida Mélanie Meillard e natiralmain è ella la gronda favorita per gudagnar omadus cursas a Les Diablerets. Da las mattas grischunas appartegna *Stephanie Jenal* da Samnaun tar quella cun il potenzial da far ina medaglia sch'ella è sa revegnida da sia blessura. Tgunsch pussaivel che intgins auters skiunzs da noss chantun ubain autras skiunzas procuran per ina surpraisa cun far ina cursa.

Cader grischun mats

Yannick Caduff, Silvano Rogentin, Livio Simonet, Sebastian Fiol, Tgaspar Darms, Didier Cadonau, Lukas Zippert, Nic Conrad, Arno Lietha, Marco Wolf, Markus Schuster, Christian Arnold e Fadri Janutin.

Cader grischun mattas

Sina Conrad, Stephanie Jenal, Elisa Salzgeber, Talina Gantenbein, Vivian Derungs, Romina Carozzi, Leonie Kreis, Melanie Michel e Jasmin Lietha.